

秦和縣志卷二十

吉安府秦和縣知縣潼關楊訥重輯

人物志二

列傳

明

陳謨子孔立劉崧子楠蕭岐子忠蕭執

廖謙羅性楊起予父用霖劉仲啟

楊卓康縉彭豫王沂弟佑

王在王迪吉王泰劉伯川

秦和縣志卷二十 人物 列傳一

余斯延梁蘭彭羣曾宜春子子叔

王環陳彥強蕭自成蕭翀

羅晉用康彥民劉埜劉麓

劉穀嚴禮楊清鄧崇志

尹純蕭介周是修子轅族孫應鰲

王韶康漢歐陽銘楊士奇子孫昱

尹昌隆子灝郭餘歐陽源陳仲述子賞

王復元梁潛梁混子栗龍說

梁蔡弟楫宋琮姚與成附曾克偉從子翰

劉子敏蕭用道楊相王直子積

孫仁蕭仁陳一敬余學夔蕭省身

歐陽和

陳循

尹崇高

陳禮

曾鶴齡

兄椿齡

歐陽哲

陳士啟

劉咸父

廖謨

尹子源

劉綱

陳永

彭詡

陳孟潔

歐陽賢

明

陳謨字一德號心吾洪武初徵至京師上賜坐議禮學士
宋濂待制王禕交章請留為國子師以式國人引疾辭
歸家居教授後學屢應聘為江浙考試官所拔皆名士
自幼能詩文初習周易後兼通詩書三禮諸經傳旁及
子史百家雖不願仕而當時之務熟籌胸中有叩如響
嘗謂學必敦本莫加於性莫重於倫莫先於變化氣質

泰和縣志

卷二十

人物 列傳二

若禮樂刑政錢穀甲兵度數之詳皆所當講一時經生
學子靡然從之稱為海桑先生事親至孝晨昏省定之
禮甘旨修澆之奉朝夕不懈尤篤友愛族黨中有為不
善不敢使聞卒年九十六所著有海桑集書經會通詩
經演疏 康熙志

按宏治志謨子孔立明經擅文章以薦為白水縣丞
又人文紀畧載宋學士濂見謨文評之曰湯盤禹鼎
器之古也太羹元酒味之正也惟知者知之楊文貞
士奇有詩曰純明程伯子洒落邵堯夫想見其為人
云又劉子高崧稱心吾鉅篇大軸流播郡邑幅巾野
服翱翔山水之間門生兒子扶藜後先使人望而敬

之狎而愛之

劉崧字子高舊名楚珠林人號槎翁家貧力學寒無鑪火手皸裂而鈔錄不輟元末舉於鄉洪武三年舉經明行修改今名召見奉天殿授兵部職方司郎中奉命徵糧鎮江鎮江多勲臣田租賦為民累崧力請得少減遷北平按察司副使輕刑省事招集流亡民咸復業立文天祥祠於學宮之側勒石學門示府縣勿以徭役累諸生嘗請減僻地驛馬以益宛平帝可其奏顧謂侍臣曰驛傳勞逸不均久矣崧能言之牧民不當如是耶為胡惟庸所忌坐事謫輸作尋放歸十三年惟庸誅徵拜禮部侍郎未幾擢吏部尚書雷震謹身殿帝廷諭羣臣陳得

泰和縣志

卷二十

人物 列傳三

失崧以修德行仁對尋致仕踰年與前刑部尚書李敬並徵拜敬國子祭酒而崧為司業賜鞍馬令朝夕見見輒燕語移時未旬日卒病作猶強坐訓諸生及革敬問所欲言曰天子遣崧教國子將責以成功而遽死乎無一語及家事帝命有司治殯殮親為文祭之崧幼博學天性廉慎兄弟三人共居一茅屋有田五十畝及貴無所增益十年一布被鼠傷始易之仍葺以衣其子居官未嘗以家累自隨之任北平攜一童往至則遣還晡時吏退孤燈讀書往往達旦善為詩豫章人宗之為西江派云

明史

按舊志載宋崇寧政和間有南立在中嶽秀三人者

同負時名稱珠林三傑洪武間又有三傑則崧及兄
麓弟埜也崧七歲能詩嘗侍父養蒙夜寢聞雞聲命
成絕句曰喚醒人間蝴蝶夢起看天上火龍飛世父
驚曰是子必大用明初以賢良徵至京宋濂見之歎
曰太史公之流後楊慎評明詩崧為第一又按通志
載吾學編劉祭酒傳稱其致仕歸學問之功老而彌
篤考子高卒時年甫六十一初被謫歸年猶未滿五
十家居久之復起為司業旬日而歿於位非老而致
仕者也所著有職方集槎翁集尚有北平集及家藏
詩十八卷又宏治志載崧子名楠字仕鴻博學世其
家洪武十七年以石泉學諭徵至京將授官而卒妻

泰和縣志

卷二十

人物 列傳四

周氏守節而死

蕭岐字尚仁柳溪人五歲而孤事祖父母以孝聞有司屢
舉不赴洪武十七年詔徵賢良強起之上十便書大意
謂帝刑罰過中訐告風熾請禁止實封以杜誣罔依律
科獄以信詔令凡萬餘言召見授潭王府長史力辭忤
旨謫雲南楚雄訓導岐即日行遣騎追還歲餘改授陝
西平涼再歲致仕復召與錢宰等考定書傳賜幣鈔給
驛歸嘗輯五經要義又取刑統八韻賦引律令為之解
合為一集每曰天下之理本一出乎道必入乎刑吾合
二書使觀者有所省也學者稱正固先生是時太祖治
尚剛嚴中外凜凜奉法救過不給而岐所上書過切直

帝不為忤

明史

按萬歷志稱岐性端重不事戲謔每在座客皆斂容諸侍者雖隆冬常汗語少不當則端坐不荅四方學者傾仰之其在平涼教大行屯營守帥及崆峒之夷皆遣子入學歲賓興應聘為楚閩二省正考官有正固先生集楊士奇為作哀詞又通志載其子忠幼被掠臨洮百戶何氏收為壻岐自平涼歸遇於道攜還家其後遂為顯族

蕭執字子所洪武三年鄉舉為國子學錄明年夏至帝有事北郊召尚書吳琳主事宋濂率文學士以從執偕陶凱等十二人入見齋所令賦詩復令賦山梔花獨喜執

泰和縣志

卷二十

人物 列傳 五

作徧示諸臣寵眷傾一時時帝留意文學往往親試廷臣執與陳觀知遇尤異執以親老乞歸親沒廬墓側申國公鄧鎮勦龍泉寇不戢下執往責之鎮為禁止邑人以安

明史

按宏治志稱執世居武山北麓仕為國子學錄施教有方以親老乞歸便養以孝聞又開義塾以教鄉人子弟親沒廬墓三年又萬歷志稱執善為文章於詩尤工極類唐人甚為劉青田基宋金華濂所推重乞歸後日與同邑劉子高崧王子與沂昆仲為溪山之遊學者宗之著有國錄集行於世

廖謙字自強世居文溪秀溪之上性孤介室中止琴一張

書一塢自號西溪愚夫又號愚寄翁元末舉明經授清江學教諭辭歸洪武初應聘署本縣學教事文章根本經傳不煩而足平居好學意興陶然未嘗一事干請後學敬慕以為師表與劉子高崧王子與沂昆弟同時相善著有愚寄集二十卷

萬歷志

羅性字子理東廂人少孤力學避元末亂崎嶇巖谷未嘗一日去書素性耿介不喜接俗人明初詔郡縣立學應聘掌教洪武四年舉於鄉勅免會試授德安府同知屬有巨寇號糟李萬戶者詔捕甚急糟李脫去逮繫至數百人性諭之曰朝廷只欲糟李耳汝等皆良民何甘受楚毒庇一糟李與之期悉縱之七日果獲糟李省檄賦

泰和縣志

卷二十

人物 列傳 六

民鐵造軍器猝無所辦會治疏圃得窖鐵萬餘斤同官皆勸以售民性曰天以濟民也悉以代民充賦餘皆入官其廉潔惠民類此秩滿坐劾謫戍西安學者從遊甚衆性學極博為詩文有法度楊士奇曾校其集傳於世

萬歷志

按萬歷志稱楊士奇少孤隨母改適性教育備至官德安攜以隨行方七歲其母私告以姓士奇泣然泣下即設磚為位祀楊氏於別室旦夕焚拜秘無知者已而性覺仍復士奇姓卒為名臣又按明史載性坐擅用棗木染軍衣謫戍西安四方老師宿儒在西方者數十人吳人鄒奕曰合吾輩所讀書庶幾羅先生

之半其為當時所傾服如此

楊起子字賓素千秋鄉人父用霖通尚書旁及百家子史元季無意進取教授閭里後進多所成就起子登洪武四年鄉舉勅免會試為黃陂令清介自守甚有惠政以考績卒於京黃陂民至今思之有祀於家者

宏治志

劉仲啟太原人性剛毅不事家人生產讀書通大義洪武初徵授陝州判官始至吏猾政梗欺偽叢生仲啟剔其尤者痛治之民害以息俗信鬼公署旁有召公祠常夜見四美婦持燭出入民異之爭相禱祀仲啟曰召公豈為是必妖也察其蹤得二狐於祠前塔下立殺之又見祠旁池蓮鮮媚令人剪除池水盡赤自是無為妖者

萬歷

秦和縣志

卷二十

人物 列傳七

志

楊卓字自立洪武四年進士授吏部主事踰年遷廣東行省員外郎田家婦獨行山中遇雨伐木卒欲亂之婦不從被殺官拷同役卒二十人皆引服卓曰卒人眾必善惡異也二十人遇一婦亂且不能況殺之乎列二十人庭下指兩卒曰殺人者汝也兩卒大驚服罪遂生十八人坐事謫鳳陽屯種召為禮部主事改杭州通判卓未至杭時有兄弟爭田累歲不決卓至垂涕不欲訊兄竟讓弟田卓精吏事吏不能欺而治尚平恕民悅服焉病免卒

明史

按宏治志作楊自立名卓一字子淵景行姪孫徙居

千秋鄉並不載事實

康縉字宗正紳溪人性穎悟嗜學洪武四年進士任平陰縣丞臨民有方陞知丹徒縣為政不尚苛刻以清靜化民去弊興利民德之卒於官

宏治志

彭豫字與志洪武中為香山丞地僻俗囂前令率尚威嚴豫至寬教令省刑罰廢墜具舉流亡來歸海濱屯帥暴橫悉遣還教民樹柵積石以禦倭寇寇不敢近俗蓄蠱毒豫廉得之誅徙其家後莫有犯卒於官

廣東名宦志

王沂字子與圯街人父以道生元大德間曾遊汴主張伯剛家張為忤梁總管力薦以道趣之入覲以道曰吾受父母命容忤而已遊必有方不敢違也辭而返至洞庭

秦和縣志

卷二十

人物 列傳 八

君山遇異人得養生術歸學養生號三槐居士元亂冠過西昌每指其廬曰此王隱君家也相戒勿毀去二子長即沂次佑字子啟兄弟俱明經赴試不售遂隱居益攻經史學詩文貧無以養俱出館於外歲歸省互述心得以質所疑元末沂以遺逸舉佑舉茂才皆不就偽漢據江西邑陷有仕偽漢者薦之兄弟避匿三顧山中寇至則奉親竄伏蹊谷伺寇所向以為進止不得寧家者十有五年明初佑始舉明經除監察御史明年沂亦應聘為廣東貢士考官徵入說書既至上書論事授福建鹽運副使以老辭歸沂學嚴於義利之辨動循古禮燕處必恭平生不言人過接引學者色莊氣和隨材造就

所居龍洲之上有竹百竿學者稱竹亭先生佑為御史
凜凜有聲出為廣西僉事尋徙知崇慶州坐累罷歸兄
弟年俱六十餘居必堂序出必鴈行裁冠衰衣玉立人
表佑詩文燬於兵今所存者長江萬里稿沂詩文宋金
華濂襄城楊伯謙為序

萬歷志

按通志稱子與兄弟皆未仕元人物志以兄沂為明
人弟佑為元人白志據泰和梁潛所撰竹亭行狀改
正今從之

王在字子所以道從子坦亮端厚博極羣書著五經文字
日自立課程不以寒暑少懈洪武初舉校官授贛州府
學教授化導有方諸生多所成就

宏治志

泰和縣志

卷二十

人物 列傳九

王迪吉字浩吾西城人通五經卓然為鄉鉅儒受業者無
間遠近出其門者皆博碩之士同時廖實字實翁著有
繫辭釋義陳霖字雲從通經史為文章有奇氣皆以博
行博學教授閭里引掖後進與迪吉齊名

宏治志

王泰字伯貞沂子以經術顯洪武十五年聘至京師應詔
者五百餘人帝親御奉天門試之伯貞對第一授試簽
事分巡廣東雷州復呂塘廢渠清鹽法會罷分巡官召
還為戶部主事命尚書趙俊受學以父喪服闋不時起
謫居安慶者數年建文初復以薦知瓊州府崖州黎相
仇殺以反聞且用兵伯貞捕其首惡數人兵遂罷瓊田
歲常三獲以賦軍軍不時受俟民乏而歛急則因之以

要利伯貞為立期三輸之而弊絕居數年大治流民來歸者萬三千餘口憂歸補肇慶未之官卒

明史

劉伯川沙村人家富而輕財年四十尚有田數千畝一日悉散予其親間所存藏獲一切遣去獨與妻處敝廬數楹僅蔽風雨旦暮饘粥而已平居不與俗人接然善觀人邑人楊士奇年十四五時與陳孟潔謁伯川村中二子皆以其故人子留款特厚一日雪霽酒酣伯川命各賦詩言志孟潔賦云十年勤苦事雞窻有志青雲白玉堂會待春風楊柳陌紅樓爭看綠衣郎士奇賦即景一首飛雪初停酒未消溪山深處踏瓊瑤不嫌寒氣侵人骨貪看梅花過野橋伯川顧孟潔笑曰十年勤苦只博

泰和縣志

卷二十

人物

列傳十

紅樓一看耶又曰不失風流一進士也顧士奇笑曰寒士寒士鼎鼐器也又曰人有不為也而後可以有為其在子乎惜予不及見也後孟潔果登進士為翰林庶吉士而卒士奇官至柱國少師皆如其言

萬歷志

余斯延自少立學從元進士劉雲章授書洪武初徵至京師以老病告歸長子學夔永樂二年進士所居名果確

齋梁潛為記

梁洎菴集

梁蘭字庭秀一云名廷秀字不移生元之季力學養母教授鄉人子弟工詩似魏晉間人有子二長曰潛次曰混皆教以明經飭行比長皆命出仕欲其報荅明時所居柳溪上闢畦蒔蔬雜種花竹日詠畦樂詩數首學者稱

畦樂先生鄒仲熙稱之曰隱居樂道其詩冲淡閒雅有自得之致

通志

按宏治志作鍾挺秀字不移別號畦桑著有畦桑先生集

彭羣字與和月池人與從兄豫俱受學於安成劉雲章之門博通羣書同有詩名而羣尤長古選學成各教授鄉閭子弟曾膺袁州龍泉學聘為教官皆不就其後與志聘為萬安訓導又以上書擢香山縣丞有政聲宣德中以子百鍊貴贈監察御史

萬歷志

按楊東里集與和篤倫誼世父沒久未葬舉其柩葬瀘源山中時山中多虎為民患迫暮假息道旁神祠

泰和縣志

卷二十

人物

列傳

十一

祠故無扃鎖虎夜環祠聲唬然與和不為動虎竟去人以為至誠之應聞同產姊兵虜在衡州即日徒步走衡贖歸又走安成求得其孤姪以歸姪中道病死躬負屍行哭買地葬已乃行族弟死妻子貧不給恒分所有以濟居無餘貲而凡振窮周急雖數無厭倦意

曾宜春字本立如驥從孫好古博雅善屬文隱居教授學者宗之洪武五年知縣劉昭先禮為耆儒以咨政治其與人言必以正心誠意為本名其堂曰本心楊士奇為記年九十六以壽終子子叔分教石城縣學卒於官

宏治志

王環字伯章梅岡人長身玉立音如洪鐘穎敏好學有志
用世因親老絕意仕進篤於孝友凡宗族鄉黨育孤葬
貧周急濟乏好行其善常以詩歌自娛自號樵雪居士
楊士奇為作記 康熙志

陳彥強以文學薦為麻陽縣丞縣雜徭最為難治彥強
操持廉潔民敬信之逃竄山谷者還集三百餘戶四郊
安堵俗少知學彥強身為之師講學諭道於是始有明
經領薦者 萬歷志

蕭自成五十九都南溪人性孝友撫兄孤如己子姪亦
敬叔如父洪武中自成以事被逮引服從戍與叔爭
往不已相抱大哭官竟按籍坐自成引哭於門外不去

泰和縣志 卷二十 人物 列傳 十二

聞者傷之家有異荆一本五榦稱為孝義所感 康熙志
按宏治志洪武丙辰有旨起均糧城甃自成以稅多
任總甲事造運舟命引往莅之或有察其黨與並為
奸利者朝廷遣官出讞引服在行恐自成不安即
以書安慰其家謂叔父年老宜留已當自行自成曰
吾兄早亡僅一子未有嗣忍擠以往乎乃奮然出告
姪引實誣冒自成名在法自成當往二人廷爭不已
至相持抱大哭官府不能決卒按籍坐自成而出引

蕭引字鵬舉以字行洪武辛酉以賢良應制賦指佞草詩
曰昔在堯階指佞奸奸臣一見攝心肝祇今聖代多賢
輔盡日階前翠色閒稱旨授蘇州同知山東鹽運副使

以勤儉廉介稱為劉崧弟子編其師集以傳後以子鉉
貴贈太子太師 林志

按舊志載鵬舉孝友事詳藝文志劉崧五荆傳又按
通志謂蕭翀事林志與人物志畧同皆不及其兄弟
而職方集所撰五荆傳則稱其同祖五人長曰翀次
璉次璣暉一門孝友致紫荆五榦之瑞顧不及翀
之宦蹟疑為別有一人不知子高作傳時翀尚未仕
惡得有宦蹟哉今考宏治志稱鵬舉以賢良徵授蘇
州府同知勤儉廉介後為山東鹽運副使禦寒惟一
緼袍詹事府丞陸中善使山東還語於朝曰蕭運副
潔清正直為山東第一惜老矣未幾卒於官有詩集
藏於家

泰和縣志

卷二十

人物

列傳十三

羅晉用字楚材東廂人父景高貧而有守景高死時晉用
方弱冠女昆弟五人一以疾廢姪一人孤且幼晉用刻
苦奉母嫁妹婚姪兼養廢疾已則不娶迨姪有子母強
之娶乃從曾學醫得異傳屢著奇效而終不言利劉雲
章陳海桑皆稱為篤行君子 康熙志

按宏治志稱景高隱於酒有伯倫之達晉用隱於醫
慕龐安之為人

康彥民號志憲洪武進士四令壯邑皆著賢聲初宰青田
改儀真巴陵以憂歸服除補天台政尚教化勸民務本
力農著有論士民書萬餘言未幾告歸家居十年宣德

初巡按御史至天台邑民言彥民公廉有為乞復召為
縣御史以聞遂再蒞台治狀為浙第一中蜚語謫江寧
丞卒諸縣各祠名宦

豫章書

劉埜字子彥珠林人崧弟洪武中徵制禮作樂通今博古
之士贛守舉埜以應條奏十事禮樂多所更定

林志

按舊志劉崧傳載其初任北平時子彥曾至省馬留
百日始還所著有西齋唱和集及其以國子徵也子
彥又應詔至京命自擇一官為豐城教諭又攝縣事
教行政肅其為詩文實由家學

劉麓埜兄字子中通書經長於詩文見元綱不振無意進
取結水竹居以教學者尤工畫龍兄弟三人皆有賢名

秦和縣志

卷二十

人物 列傳 十四

人稱為珠林三傑

宏治志

劉穀字原實西廂人與王佑同時領薦同日拜監察御史
風裁肅然無忝厥職

宏治志

嚴禮字從禮宋秘書校勘肅之遠孫洪武間典教邑庠徵
試太極性善二論除國子學正明年開科取士館下與
薦者十七人禮與馬上嘉之授將仕郎復命註解尚書
賜坐講說屢被獎諭

康熙志

楊清字子肅洪武庚戌以舉授松江府知事上使下一
以誠意人不忍欺之三年遷福建鹽運使知事居官服
食一如布衣時雖廉潔不務為民沒之日家無一錢所
著詩文有溪園餘閒錄宦遊錄

宏治志

鄧崇志字彥高以文學德操與楊子淵羅子理齊名世稱
楊羅鄧洪武初分教邑庠徵授四川榮陽鹽井陘茶鹽
都運使經歷冰蘖之操彌厲有詩文集宏治志

尹純字務厚山田人洪武初分領本縣學教事陞上海教
諭嘗捐已田作陂以利耕種鄉人名曰尹公隄宏治志

蕭介字安石十二都人嘗從劉子彥習詩尤工楷書洪武
十五年任解州鹽課使提舉轉廣鹽倉大使有海天長

嘯集宏治志

周是修名德以字行洪武末舉明經為霍邱訓導太祖問
家居何為對曰教人子弟孝弟力田太祖喜擢周府奉
祀正逾年從王北征至黑山還遷紀善建文元年有告

泰和縣志

卷二十

人物 列傳 十五

王不法者官屬皆下吏是修以嘗諫王得免改衡府紀
善衡王惠帝母弟末之藩是修留京師預翰林纂修好
薦士陳說國家大計燕兵渡淮與蕭用道上書指斥用
事者為所怒共挫折之是修屹不為動京城失守留書
別友人楊士奇等付以後事具衣冠為贊繫衣帶間入
應天府學拜先師畢自經於尊經閣年四十九燕王即
帝位陳瑛言是修不順天命請追戮帝曰彼食其祿自
盡其心勿問是修外和內剛志操卓犖非其義一介不
苟得也嘗曰忠臣不計得失故言無不直烈女不慮生
死故行無不果嘗輯古今忠義事為觀感錄其學自經
史百家陰陽醫卜靡不通究為文援筆立就而雅贍條

達初與士奇縉靖及金幼孜黃淮胡儼約同死臨難惟是修竟行其志云

明史

按萬歷志是修爵譽人少孤貧從遊鄉先生胡渚樵蕭國錄所著有芻蕘集觀感錄綱常懿範等書所薦士梁潛等皆知名當時正德末邑諸生彭邦瑞獻詩通言時事有一民尺地歸英主白日青天見此公之句始祀鄉賢萬歷七年邑有司為之表其里又康熙志稱是修子轅蘇州訓導萬歷中族孫應鰲刻其遺集其自經之帶猶世藏之又人物志載是修所著有詩集義論語類編廣衍太極圖邇言家訓芻蕘集進思集綱常懿範等書今傳者為芻蕘集又人文紀畧

泰和縣志

卷二十

人物

列傳

十六

稱是修詣國學繼於聖廟東廡下與明史異附存備考

再志

王韶字九成自幼孝親年十三隨父出遇盜執其父將殺之韶冒白刃抱父號曰寧殺我盜不忍舍其父去又有讐家欲殺其父尋之不得竟欲殺韶或曰是嘗脫父於盜者奈何因讐其父而忍殺其子乎遂釋韶

康熙志

康漢字魯章有孝行父病痿常侍湯藥衣不解帶既沒廬墓三年一夕冠至伏地號曰家財恣所欲取惟無驚吾先靈與老母耳冠哀其言棄去晨起必焚香告天以祈母壽及母喪哀毀如喪父時

康熙志

歐陽銘字日新東廂人以薦除江都縣丞兵燹後民死徙

者十七八銘招徠拊循漸次復業有繼母告子不孝者呼至案前委曲開譬母子泣謝去卒以慈孝稱嘗治廨後隙地得白金百兩會部符徵漆即市之以輸遷知臨淄常遇春師過其境卒入民家取酒相毆擊一市盡譁銘笞而遣之卒訴令罵將軍遇春詰之銘曰卒王師民亦王民也民毆且死卒不當笞耶銘雖愚何至罵將軍將軍大賢奈何私一卒撓國法遇春解為責軍士以謝後大將軍徐達至軍士相戒曰是健吏曾抗常將軍者毋犯也銘為治廉靜平恕暇則進諸生講文藝或單騎行田間課耕獲邑大治秩滿入覲卒

通志

按宏治志稱銘清修篤學元至正丙申與劉楚同鄉

秦和縣志

卷二十

人物

列傳

十七

舉明初州尹吳去疾首薦應詔授臨淄縣丞陞江都知縣不受私謁有古循吏風此作除江都縣丞疑脫

誤冉志

楊士奇名寓以字行早孤隨母適羅氏已而復宗貧甚力學授徒自給建文初修太祖實錄用薦入翰林充編纂官尋授吳王府審理副仍供館職永樂初改編修簡入內閣典機務累陞諭德士奇奉職甚謹私居不言公事雖至親厚不得聞在帝前舉止恭慎善應對言事輒中人有小過嘗為掩覆之六年帝北巡命與蹇義黃淮留輔太子太子喜文辭贊善王汝玉以詩法進士奇曰殿下當留意六經暇則觀兩漢詔令詩小技不足為也太

子稱善初帝起兵時漢王數力戰有功帝許以事成立為太子既而不得立怨望帝又憐趙王年少寵異之由是兩王合而間太子帝頗心動九年還南京召士奇問監國狀士奇以孝敬對十一年正旦日食禮部尚書呂震請勿罷朝賀侍郎儀智持不可士奇亦引宋仁宗事力言之遂罷賀尋進翰林學士改左春坊大學士仁宗即位擢禮部侍郎兼華蓋殿大學士帝御便殿蹇義夏原吉奏事未退帝望見士奇謂二人曰新華蓋學士來必有讜言試共聽之士奇入言恩詔減歲供甫下二日惜薪司傳旨徵棗八十萬斤與前詔戾帝立命減其半進少保與同官楊榮金幼孜並賜繩愆糾謬銀章得密

秦和縣志

卷二十

人物 列傳 十八

封言事進少傅兼兵部尚書時大理少卿弋謙以言事得罪士奇曰謙應詔陳言若加之罪則羣臣自此結舌矣帝立進謙副都御史而下勅引過時有上書頌太平者士奇獨曰陛下雖澤被天下然流徙尚未歸瘡痍尚未復民尚艱食更休息數年庶幾太平可期帝曰然因顧蹇義等曰朕待卿等以至誠望匡弼惟士奇曾五上書卿等皆無一言豈果朝無闕政天下太平耶諸臣慚謝是年賜璽書制楊貞一印賜之宣德元年漢王高煦反帝親征平之師還次獻縣之單家橋侍郎陳山迎謁言漢趙二王實同心請乘勢襲彰德執趙王士奇曰事當有實天地鬼神可欺乎太宗皇帝三子今上惟兩叔

父有罪者不可赦其無罪者宜厚待之疑則防之使無虞而已何遽加兵傷皇祖在天意乎帝初無罪趙意移兵事得寢時交趾數叛屢發大軍征討皆敗沒黎利遣人偽請立陳氏後士奇力言陛下恤民命以綏荒服不為無名漢棄珠厓前史以為美談不為示弱許之便於是棄交趾罷兵歲省軍興鉅萬尋勅鴻臚寺士奇老有疾趨朝或後毋論奏帝以四方屢水旱召士奇議下詔寬恤免災傷租稅及官馬虧額者士奇因請並蠲逋賦薪芻錢減官田額理寃滯汰工役以廣德意踰二年帝謂士奇曰恤民詔下已久今更有可恤者乎士奇曰前詔減官田租戶部徵如故帝怫然曰今首行之廢格者

泰和縣志

卷二十

人物

列傳

十九

論如法士奇復請撫逃民察墨吏舉文學武勇之士令極刑家子孫皆得仕進又請廷臣三品以上及二司官各舉所知備方面郡守選皆報可英宗即位士奇首請練士卒嚴邊防設南京叅贊機務大臣分遣文武鎮撫江西湖廣河南山東罷偵事校尉又請以次蠲租稅慎刑獄嚴覈百司皆允行進少師乞致仕不允勅歸省墓未幾還初正統初士奇言瓦剌漸強將為邊患而邊軍缺馬恐不能禦請於附近大僕寺關領西番貢馬亦悉給之士奇歿未幾也先果入寇有土木之難識者思其言又雅善知人好推轂寒士所薦達有初未識面者而於謙周忱况鍾之屬皆用士奇薦居官至一二十年廉

能冠天下為世名臣九年卒年八十贈太師諡文貞次
子稹以蔭補尚寶丞成化中進大常少卿掌司事明史

按通志正統時內閣稱三楊以居第目士奇曰西楊
楊榮曰東楊而溥嘗自書郡名曰南郡因目為南楊
又萬歷志稱士奇貴極人臣隱約一似儒生其操持
正直莫不敬憚及至取士論人率多平恕常語人曰
天下萬世之事當以天下萬世之心處之次子稹以
蔭為尚寶司丞仕終南京太常寺卿長孫昱太僕寺
丞所著有沙羨稿石臺藁文籍志法書志東里集三
朝聖諭錄祀鄉賢

國朝雍正二年奉

泰和縣志

卷二十

人物 列傳 二十

旨崇祀歷代帝王廟配享春秋並給帑修祠墓又康熙志士
奇名寓作遇疑誤

尹昌隆字彥謙灌塘人洪武三十年進士第二人授編修
改監察御史建文初位視朝晏昌隆疏諫曰高皇帝雞
鳴而起昧爽而朝未日出而臨百官故能庶績咸熙天
下乂安陛下嗣守大業宜追繩祖武兢兢業業憂勤萬
幾今乃即於晏安日上數刻猶未臨朝羣臣宿衛疲於
伺候曠職廢業上下懈弛播之天下傳之四裔非社稷
福也帝曰昌隆言切直禮部其宣示天下使知朕過未
幾以地震上言謫福寧知縣燕兵既逼昌隆以北來奏
章動引周公輔成王為詞勸帝罷兵許王入朝設蹉跌

獄永樂初改北平按察知事時皇嗣未立武臣有言漢王有扈從功者上猶豫驛召昌隆至叩首曰長嫡承統萬世常經由是仁宗得為皇太子進昌隆中允竟因漢王讒黜為禮部主事及谷王謀逆事覺震陰令女習昌隆字雜獄詞中誣昌隆與同謀坐棄市後震死仁宗聞之曰是曾殺朕師者訪昌隆子得灝命大學士楊士奇字之賜御馬遣歸於是寃狀得暴

郭餘字慶宜洪武間徵論道之士應詔授廣東按察僉事有禹貢傳註詳節行於世

林志

歐陽源字允清蜀江人明初應聘為涑水訓導革除閒嘗

上言大計不報追論謫戍興州

萬歷志

泰和縣志

卷二十

人物

列傳

二十二

陳仲述名繼先以字行登洪武進士授監察御史篤志潔修居官十年一布被猶書生時故物時進士名能古文者皆推仲述為第一懿文太子稱之曰陳古文既卒無產業其子賞力學無資鄉人易之表兄梁本之混旦夕督勵得舉於鄉亦登第官廣西按察司僉事其清苦一如仲述卒益貧甚無以庇妻子部使者黃翰至泰和感夢為之復其故居

萬歷志

王復元字子復灘江人洪武丙子選江西鄉試後四年試禮部授化州學正績最陞北監博士剗削鋒銳務為和易預修五經性理大全諸書書成受厚賜以風疾不起卒於官為人儉約質率無崖岸嗜為文章所著文集若

千卷藏於家第敬先率直闔爽悖義薄利初為宜章訓導陞岳池教諭化導誘掖所至政績懋著卒於蜀

楊東里集

梁潛榜姓鍾字用之蘭子舉洪武丙子科鄉試授四川蒼

溪訓導以薦除知四會縣改陽江陽春皆以廉平稱永

樂元年召修太祖實錄書成擢修撰尋兼右春坊右贊

善代鄭賜總裁永樂大典帝幸北京屢驛召赴行在十

五年復幸北京太子監國帝親擇侍從臣翰林獨楊士

奇以潛副之有陳千戶者擅取民財令旨謫交趾數日

後念其有功貸還或讒於帝曰上所謫罪人皇太子曲

宥之矣帝怒誅陳千戶事連潛及司諫周冕逮至行在

親詰之潛等具以實對帝謂楊榮呂震曰事豈得由潛

泰和縣志

卷二十

人物 列傳 二十三

然卒無人為白者俱繫獄或毀冕放恣遂并潛誅

明史

按潛所著有泊菴集王文端直為序稱其少從王子

啟受詩經又從陳仲述學古文侍仁宗在東宮監國

時所言皆本於仁義他非所及仁宗嘗賜詩以寵之

又稱其入翰林為修撰陞侍讀兼春坊贊善本傳脫

去陞侍讀附此備考

再志

梁混字本之潛弟天性至孝幼嗜學日夜研鑽傳註遂貫

通經史歷瑞州溧陽兩學官陞蜀府紀善改魯府卒於

官所著有坦菴集子栗字叔莊官國子學錄有文名

宏治

龍說字子與武溪人從劉雲章受易善講太極圖學者洒

然忘倦為文章以理為主操行端潔雲章沒心喪三年
龍泉儒學聘為訓導師道尊嚴生徒敬服

宏治志

梁蔡字叔車潛子正統元年由進士為刑部主事善辨冤
獄用薦擢廣西副使進布政使將士多殺良民報功蔡
諭其帥生致難民一人准功一級全活無筭田州土官
岑鑑兄弟相讐蔡為解之却其厚餽撫服梗化女土官
民夷服其信義終浙江布政使

明史

按宏治志載蔡官廣西布政習知夷性獷戾不可繩
以法往往簡節疎目撫之夷大悅服未幾以才堪治
劇薦浙江左布政使操守益堅持行益謹天順中入
覲恩賚甚隆清操粹行為時稱最滿九載卒於官著

泰和縣志

卷二十

人物 列傳 二十四

有松軒集又宏治志載蔡弟楫字叔濟歷官太平知
縣晚年家居著述甚富

宋琮字萬鍾洪武末舉鄉試第二明年會試第一與尹昌
隆同登第授御史以忤權貴出知永福縣都御史奏留
之復職尋以誣繫獄得白罷歸續由薦舉除海門訓導
九年滿考陞刑科給事中差撫荊州歸省左遷詹事府
錄事留春坊點書陞翰林檢討致仕

萬歷志

按通志載琮洪武三十年會試第一北士無預者琮
善易學悵然語人曰翰苑當有厄吾其竄乎既而諸
生言劉三吾白信蹈等南人私其鄉帝怒命侍講張
信等覆閱不稱旨有言信等故以陋卷呈由三吾等

囑之也帝益怒信蹈等論死三吾以老試邊琮亦遣
成帝親策問更試擢六十一人皆北士時謂之南北
榜又曰春夏榜云永樂初赦還起刑部檢校鄉人楊
士奇輩貴顯琮無所攀援宣德中以檢討掌助教事
卒之前預刻死期或叩之以休咎輒不應冉志

姚與成與曾克偉同居秀溪之上世為比隣與成七歲時
鄉長者曾命對曰階前文武花初發即應聲云山上君
臣藥已生聞者駭賞年十九與克偉同舉於鄉明年又
登第與成授戶部主事出按直隸諸郡有廉能聲歸奏
對稱旨賜圖書宴賚特厚卒年二十七克偉任御史按
湖廣福建山東浙江遼東等處風聲焯焯以事謫戍用
泰和縣志

卷二十

人物

列傳

二十五

薦復起為刑部員外郎丁憂奪情起復授龍州同知歲
餘援例歸朝未行而卒萬歷志

按宏治志與成從子瀚字思寬博學多才歷官雲南
按察經歷著有鶴巢詩文集冉志

劉子敏劉家岡人父壽叔雅尚林泉不樂仕進子敏其第
三子也洪武末為山東道御史有能名以言事忤權貴
黜為侯官令又言事降侯官典史益修其職嘗自署曰
祿薄儉常足官卑廉自高永樂初徵拜河南道御史尋
陞山東按察副使改湖廣廣東以疾辭歸萬歷志

蕭用道岐子建文中舉懷才抱德詣闕試文章擢靖江王
長史召入翰林修類要燕師渡淮與周是修同上書指

斥用事者永樂初預修太祖實錄改右長史從王之藩
桂林作端禮體仁遵義廣智四門箴以獻後以疾乞歸
卒於家通志

按楊東里集用道初名遵字用道後以字行遂別字
坦行吉安知府朱仲智舉送京師試文章擢靖江府
直史授承直郎永樂初陞右長史授奉議大夫從王
之國桂林通志所載用道前後官次疑誤甫志

楊相字之宜景行元孫幼端靜不好兒弄其父思貽督教
之十五以易經舉省試明年會試中副榜當授教官思
貽奏臣之子年與學皆未可為人師幸俾臣以歸教之
庶他日不辱任使從之永樂二年會試天下貢士相名

泰和縣志

卷二十

人物 列傳 二十六

在第一廷試二甲第一選為翰林庶吉士時太宗銳意
文學擇會祭等二十八人讀書禁中賜第給膳十年授
刑部主事勤職不怠為人篤於孝友審於擇友有易義
并文集藏於家宏治志

王直字行儉泰和人父伯貞洪武十五年以明經聘至京
時應詔者五百餘人伯貞對第一授試僉事分巡廣東
雷州復呂塘廢渠清鹽法會罷分巡官召還為戶部主
事以父喪服闋不時起謫居安慶建文初復以薦知瓊
州崖州黎相仇殺以反聞且用兵伯貞捕其首惡兵遂
罷瓊田歲常三獲以賦軍軍不時受俟民之乃急斂以
要利伯貞為立期三輸之弊始絕居數年大治流民占

籍者萬餘憂歸卒於家直幼而端重家貧力學舉永樂二年進士改庶吉士與曾榮王英等二十八人同讀書文淵閣帝善其文召入內閣俾屬草尋授修撰歷事仁宗宣宗累遷少詹事兼侍讀學士正統三年宣宗實錄成進禮部侍郎學士如故五年出莅部事尚書胡濙悉以部政付之直處之若素習者八年正月代郭璉為吏部尚書十一年戶部侍郎余亨附王振構郎中趙敏詞連直及侍郎曹義趙新並下獄三法司廷鞫論亨斬直等贖徙帝宥直義奪亨新俸帝將親征也先直率廷臣力諫曰國家備邊最為謹嚴謀臣猛將堅甲利兵隨處充滿且耕且守是以久安今敵肆猖獗違天悖理陛下

秦和縣志

卷二十

人物 列傳

二十七

但宜固封疆申號令堅壁清野蓄銳以待之可圖必勝不必親御六師遠臨塞下况秋暑未退旱氣未回青草不豐水泉猶塞士馬之用未充兵凶戰危臣等以為不可帝不從命直留守王師覆於土木大臣羣請太后立皇子為皇太子命郕王攝政已勸王即位以安反側時變起倉卒朝臣議屢上皆直為首而直自以不如于謙每事推下之雍容鎮率而已加太子太保景泰元年也先使使議和且請還上皇下禮部議未決直率羣臣上言曰太上皇惑細人言輕身一出至於蒙塵陛下宵衣旰食徵天下兵與羣臣兆姓同心僇力期滅此朝食以雪不共戴天之恥廼者天誘其衷也先有悔心之萌而

來求成於我請還乘輿此轉禍為福之機也望陛下俯從其請遣使往報因察其誠偽而撫納之奉太上皇以歸少慰祖宗之心陛下天位已定太上皇還不復涖天下事陛下第崇奉之則天倫厚而天眷益隆誠古今盛事也帝曰卿等言良然但前後使者五輩往終不得要領今復遣使設彼假送駕為名來犯京師豈不為蒼生患賊詐難信其更議之已而瓦剌別部阿剌使復至胡濙等復以為言於是帝御文華殿門召諸大臣及言官諭以宜絕狀直對曰必遣使毋貽後悔帝不悅于謙前為解帝意釋羣臣既退太監興安匍匐出呼曰若等固欲遣使有文天祥富弼其人乎直大言曰廷臣惟天子

泰和縣志

卷二十

人物 列傳

二十八

使既食其祿敢辭難乎言之再聲色愈厲安語塞乃議遣使命李實羅綺往既行而瓦剌可汗脫脫不花及也先使先後至將遣歸使者謂館伴曰中國關外十四城皆為我有前阿剌知院使來尚遣人偕往今亦必得大臣同行庶有濟胡濙以聞下廷議直等固請乃遣楊善等報之比實還又以也先使至具言也先欲和狀直與寧楊侯陳懋等上疏請更遣使齎禮幣往迎上皇不許復上疏曰臣等與李實語具得彼中情事其所需衣物資斧者上皇言也而奉迎車駕也先意也昨者脫脫不花及阿剌知院使來皆有報使今也先使以迎請為辭乃不遣使與偕是疑敵而召兵也又不許已而實自言

於帝帝第報也先書就令楊善迎歸而已直等復上言
今北使已發願本上皇之心順臣民之願因彼悔心遣
使往報以圖迎復此不待計而決者也不然衆志難犯
違天不祥彼將執為兵端邊事益棘京師亦不得高枕
卧矣帝乃命羣臣擇使直與陳懋等請仍遣實報曰候
善歸議之御史畢鑾等復上疏力言就令彼以詐來我
以誠往萬一不測則我之兵力固在帝終不聽已而善
竟奉上皇還二年也先遣使入貢且請答使直屢疏言
邊備未修芻糧未積瘡痍未復宜如其請遣使往以觀
虛實開導其善不許無何也先遣騎入塞以報使為辭
直與羣臣復請之卒不許直等乃上疏言陛下銳意治

兵為戰守計真大有為之主然使命不通難保其不為
寇宜勅沿邊守臣發兵遊徼有警則入保無事則力耕
陛下於機務之暇時召京營總督總兵詢以方畧誠接
而禮貌之信賞罰以持其後斯戰守可言也帝曰善明
年正月進少傅帝欲易太子未發會思明土知府黃瑄
以為請帝喜下禮部議胡濙唯唯文武諸臣議者九十
一人當署名直有難色陳循濡筆強之乃署竟易皇太
子直進兼太子太師賜金幣加等頓足歎曰此何等大
事乃為一蠻酋所壞吾輩愧死矣景帝疾亟直濙等會
諸大臣臺諫請復立沂王為皇太子推大學士商輅草
疏未上而石亨徐有貞等奪門迎上皇復位殺王文等

疏草留姚夔所嘗出以示郎中陸昶歎曰是疏不及進天也直遂乞休賜璽書金綺楮幣給驛歸直為人方面修髯儀觀甚偉性嚴重不苟言笑及與人交恂恂如也在翰林二十餘年稽古代言編纂紀注之事多出其手與金谿王英齊名人稱二王以居地目直曰東王英曰西王直以次當入閣楊士奇不欲也及長吏部益廉慎時初罷廷臣薦舉方面大吏專屬吏部直委任曹郎嚴抑奔兢凡御史巡方歸者必令具所屬賢否以備選擇稱得人其子穉為南國子博士考績至部文選郎欲留侍直直不可曰是亂法自我始也朝廷以直老命何文淵為尚書佐之文淵去又命王翺部遂有二尚書直為

泰和縣志

卷二十

人物

列傳

三十

尚書十四年年益高名德日益重帝優禮之免其常朝比家居嘗從諸佃僕耕蒔擊鼓歌唱諸子孫更迭舉觴上壽直歎曰曩者西楊抑我令不得共事然使我在閣今上復辟當不免遼陽之行安得與汝曹為樂哉天順六年卒年八十四贈太保諡文端穉仕至翰林檢討亦以學行稱曾孫思自有傳

明史

贊曰高穀之清直胡濙之寬厚王直之端重蓋皆有大臣之度焉當英景之間國勢初更人心觀望執政任事之臣多阿意取容而穀濙惓惓於迎駕之儀直侃侃於遣使之請皆力持正議不隨衆俛仰故能身負碩望始終一節可謂老成人矣

陳一敬循之從叔幼與楊士奇同學於陳海桑謨相善由
薦舉為賀縣丞有惠政以直同寮寃坐罪歸萬歷志

余學夔字一夔珠木人自幼喜學篤於孝弟忠信舉永樂
二年進士選為庶吉士預修永樂大典授翰林檢討又
預修五經四書性理大全永樂甲辰陞侍講修國史年
五十六以疾致仕家居以文字自娛歲賓興廣東聘主
考試稱得人卒年七十三有北軒集宏治志

蕭省身岡下坑人與同郡李昌祺同舉永樂甲申進士洪
熙元年布政考滿當給誥命奏父年八十餘願以給父
帝嘉而許之後遂為例居河南十二年繩豪滑去貪殘
疏滯舉廢救災恤貧治行與昌祺等明史

泰和縣志

卷二十

人物

列傳

三十一

按豫章書省身初由庶吉士改刑部主事進郎中超
擢河南右藩卒時年甫五十萬歷志稱其為人溫雅
端潔風聲樹於士林再志

歐陽和字允和蜀江人永樂壬辰進士授北京道監察御
史寬厚坦亮遇事持風裁文皇巡幸北京仁宗為太子
監國一時宵小構扇上下惶惑因挺言曰東宮吾君之
子他日君我者也何可計私匿情有問以實對文皇亟
稱之曰歐陽御史真識大體者征播有功陞雲南副使
父觀民年九十五終於家聞訃哀毀馳歸卒通志

陳循字德遵永樂十三年進士第一授翰林修撰習朝廷
典故帝幸北京命取秘閣書詣行在遂留侍焉洪熙元

年進侍講宣德初受命直南宮日承顧問賜第玉河橋西巡幸未嘗不從進侍講學士正統元年兼經筵官久之進翰林院學士九年入文淵閣典機務初廷議天下吏民建言章奏皆三楊主之至是榮士奇已卒循及曹鼐馬愉在內閣禮部援故事請帝以楊溥老宜優閒令循等預議明年進戶部右侍郎兼學士土木之變人心洶懼循居中所言多採納進戶部尚書兼職如故也先犯京師請勅各邊精騎入衛馳檄回番以疑敵帝皆從其計景泰二年進少保兼文淵閣大學士帝易太子加兼太子太傅進華蓋殿大學士兼文淵閣如故英宗復位于謙王文死杖下循戍鐵嶺衛循在宣德時御史張

泰和縣志

卷二十

人物

列傳

三十二

楷獻詩忤旨循曰彼亦忠愛也遂得釋御史陳祚上疏觸帝怒循婉為解得不死景帝朝嘗集古帝王行事名勤政要典上之河南河北大雪麥苗死請發帑市麥種給貧民因事進言多足採者然久居政地刻躁為士論所薄其嚴譴則石亨輩為之非帝意也亨等既敗詔釋為民一年卒成化中于謙事雪其子引例請卹乃復官

賜祭所著有芳洲集

明史

尹崇高塘西人登永樂十三年第為南京監察御史風聲

赫然嘗按浙江等處貪暴絕跡後以事謫寧國推官

宏治志

陳禮字正言柳溪人永樂壬辰進士初釋褐試事都察院上偉其儀擢思南守既至蠻民獷暴弗奉法禮為政先

恩惠而後法度蠻民無敢撓首苗普亮作亂禮遣人招之弗順會鎮遠侯率師至禮挾士兵以從普亮就執放其黨民賴以安羊溪苗蠻叛禮遣諭之皆曰吾避前官虐政耳賢太守至願相率以歸郡多荒田租稅以萬計民甚病之禮奏除其額詔從之以外艱去歲餘郡守闕人詔起除臨安府臨安蠻酋恃險剗剗禮至單騎往諭皆款服凡為民辯冤摘伏明決如神故所歷皆有治聲既卒思南臨安皆思之不忘

楊榮撰陳臨安墓碑

按陳禮祀思南臨安名宦見續廣事類賦

曾鶴齡字延年一字延之存翁曾孫初與兄椿齡同舉永樂三年鄉試值家貧椿齡先會試登第為吉士鶴齡獨

泰和縣志

卷二十

人物

列傳

三十三

留家授徒養父母又十七年為永樂辛丑始赴會試廷對第一授修撰進侍讀出主考順天鄉試場屋火試卷殘缺有司懼罪不敢請更試鶴齡曰必更試然後滌百弊以昭至公不然雖無私此心亦欺朝廷矣有司具聞命下悉如所請預修永樂洪熙宣德實錄累官侍講學士以疾卒生平和厚易直好正人以義而亦能受人言雖嫉邪無怨之者教人先行後文率多成就子序蒙簡俱舉進士

康熙志

按通志鶴齡所著有松坡集昭度集其事詳見王文

端所撰墓志中

再志

歐陽哲字廣哲蜀江人永樂辛丑進士由吏部主事擢浙

江提學僉事時初設提學哲首被命以行所至鑒別公
明大得士心尋丁內艱服除改浙江提刑僉事陞河南
副使上疏言漕河利害董築張秋建四事詔如其言九
年考績至京乞致仕家居十五年足跡不及城府卒年
八十有餘

萬歷志

按楊東里集有蜀江歐陽氏族譜序云哲居泰和之
蜀江里其先出唐吉州刺史琮因有家於吉琮七世
孫曰彪曰彤彤宋文忠修所自出也彤會昌中舉進
士官至工部尚書子澤居吉之永和縣澤四世孫曰
忠曰愚忠徙萬安之常溪愚乃珣之所自出也常溪
七世至德祖徙蜀江迨哲八世又按人物志載哲歷

泰和縣志

卷二十

人物

列傳

三十四

官四十年以清介著有雪坡集

冉志

陳士啟名雷以字行別字震之永樂二年進士選庶吉士
擢禮部郎中尚書呂震擠尹昌隆至死屬吏皆憚之承
奉唯謹士啟獨不少徇永樂十二年吏部言布按二司
多缺官諸曹郎給事中出為監司者二十餘人士啟得
山東右叅政盡心吏事不為察察名督徭賦不峻期約
青州饑疏請賑之粟使至而饑民倍士啟復上疏先出
粟予民謂使者曰有罪吾獨任廷議竟從之坐唐蹇兒
亂下獄數月釋還職高煦謀不軌士啟密聞於朝煦既
執從薛祿張本錄餘黨撫安人民事竣命清理山東軍
籍宣德六年卒於官

通志

按通志文稱士啟事蹟詳見曾松臞所撰行狀中獨不及密啟高煦不執事志再

劉咸字士皆博學有行曾著快閣賦傳誦於時登永樂進士歷官河南按察僉事陞副使尋改廣東副使時繕營北京被命董木料卒於官咸律已廉用法恕巡歷郡縣必求忠孝節義可勵俗者表之曰此治化先務也文章政事俱有名於時著有河南詠古集虛菴集萬歷志

按東里序咸父名彞字仲良咸迎養不赴於邑南澄江之陰十數里買田築室率少子就耕所耕足歲計外有餘閒釀酒獨酌賦詩為樂泊然無他營志再

廖謨字子謨舉廣東鄉試永樂十三年登第選庶吉士出秦和縣志

卷二十

人物

列傳

三十五

為長沙潁上二縣陞刑部郎擢福建按察僉事正統中調河間府同知以廉能陞本府知府卒於官民思之子世清名類重義喜施撫孤姪甚厚又施百棺以葬無告者由江寧縣主簿陞本縣丞孫佩以鄉舉官工部員外郎陞廣西知府年方壯遽致仕歸家詩酒自娛羅整菴為作墓志萬歷志

按通志作廖謨字文績與此異志再

尹子源號巖泉存仁孫博學篤行以薦入翰林與修永樂大典書成授福清河泊官廉慎愛民素與楊士奇王直

最友善宏治志

劉綱字尚紀西廂人永樂中以薦舉歷知興寧通山陽城

臨海四縣正統中擢嚴州府通判清操彌勵為按察使
軒輓所知保陞本府知府始終一節九年致仕又同里
蕭吉字仲敬與綱同起用任宣城知縣有善政宏治志

陳永字德清一敬子幼孤能自奮力學宣德中任常州府
學訓導正統初擢河南道御史出按湖廣福建所至焯
著能聲陞浙江按察僉事有平寇功宏治志

彭詡字士揚父原復母劉氏士揚早孤劉賢教育之刻苦
自奮吉安郡學舉士揚訓導赴吏部送翰林考經義為
尚書蹇義所賞識時英國公張輔奏求儒師遂以士揚
應選從英國征交趾凡軍中奏疏檄諭悉出其手英國
於事關切要者必與定議還授國子監典籍為人篤於

泰和縣志

卷二十

人物

列傳

三十六

義負直氣能輔人於道

楊東里集

陳果字孔碩雋爽廉重讀書一過目輒了大義篤於孝友
哀慕終身喪祭一用朱子禮不為浮屠老子之教凡子
凱不肖矯父命奪其貲直數十萬緡悉置不校曰吾豈
以是傷同氣哉嘗愛華山之勝自號太華生蘇伯衡為
著傳子孟潔以才學擅名登永樂丙戌進士入翰林為

庶吉士

楊東里集

歐陽賢字允賢洪武庚午以書經舉鄉試明年會試中教
官歷嚴州興化教授永樂初陞國子助教兼通詩春秋
自祭酒司業以下咸禮重之楊東里集

泰和縣志卷二十終

